



Per il president da la Federaziun internaziunala da skis, Gian Franco Kasper, è l'occurrènza segir singulara cun avair lieu quella en sia vischnanca.

FOTOS G. N. STGIER



Nicolin Bezzola (a san.), l'antierur moderatur dad RTR, è ina da las quatter persunas ch'èn responsablas per las medias. Qua en discussiun cun dus voluntaris.



Lindsey Vonn ier a San Murezzan. Accumpanà ella ha ses chaun Lucy.



Quest signet uffizial vegn ad accompagnar nus tras l'entir campiadun.



Urs Lehmann, il president da Swiss Ski, è plain optimissem per il Campiadun mundial da skis en il Grischun.



Nossa speranza per far medaglias a San Murezzan: Lara Gut. Ella saja puspè sauna e pronta per far medaglias, ha ella ditg als passa 150 schurnalists.

LA FOTO DAL DI

Allegra: Jau sun Moritz

(anr/gns) Quel capricorn è il mascottin uffizial dal Campiadun mundial da skis a San Murezzan. Fin avant in onn n'aveva el nagin num. A chaschun dal final da la Cuppa mundiala da skis il mars 2016 a San Murezzan ha ina giuria cun skiunzas e skiunzas da la Svizra, schurnalists sco era commembers dal comitè d'organiziun dal Campiadun mundial da skis 2017 a San Murezzan decidì da dar al capricorn il num Moritz. Per las proximas duas emnas vegn Moritz a divertir ils blers fans da skis, a gratular als victurs ed a las victuras e consolar las sportistas ed ils sportists che n'han fatg nagina medaglia.



Moritz, il mascottin che vegn a far plachair a blers durant il Campiadun mundial da skis a San Murezzan.

MAD

«Nus essan pronts»

Campiadun mundial da skis a San Murezzan

DA GION NUTEGN STGIER / ANR

■ San Murezzan, ils organisaturs, tut ils voluntaris e cunzunt er Swiss Ski, tuts ensemen èn semtgads per l'entschatta da l'occurrènza internaziunala che cumenza oz. Ier han las persunas principalas da quel Campiadun mundial da skis infurmà ils meds da massa. Sa preschenta San Murezzan fin gievgia passada anc cun intginas spundas brinas è la situaziun sa midada en in culp cun adina puspè naiver. Exact per l'entschatta dal Campiadun mundial da skis sa preschenta la regiun en in bel vestg d'enviern. La culissa savess strusch esser pli particulara e correspunda cumpletmain ad in event da sport d'enviern. Uschia po la gronda festa cumenzar almain quai che pertutga il maletg.

Nagina gronda hectica

El saja ventiraivel che oz saja la partenza da l'occurrènza, ha ditg Hugo Wetzel, il president dal comitè d'organiziun. Ils davos tschintg onns sajan stads pulit intensiv. «Nus essan pronts», punctuescha l'um che è gia per la segunda giada dapi il 2003 president dal comitè d'organiziun local dal Campiadun mundial da skis. Da preschenta saja la situaziun en vischnanca calma ed avant maun saja er nagina hectica. Wetzel ha ditg ch'el haja in grond giavisch e quai saja ch'els fans procurian per ina buna atmosfera en il territoriu da las cursas e lura er a San Murezzan.

Cuntents cun la prevendita

Il directur dal campiadun mundial Franco Giovanoli ha ditg che la prevendita saja fin uss in success e la cerimonia d'avertura saja vendida or. Las pistas sajan stupentas tiers la naiv nova. Per la Federaziun da skis internaziunala saja quest



Hugo Wetzel, il president dal comitè d'organiziun.

enviern in temp cun intginas sfidas, ha ditg il directur Gian Franco Kasper, cun avair lieu trais campiaduns mundials. Quai sajan ski alpin a San Murezzan, las occurrènzas nordicas a Lahti e quellas da freestyle a la Sierra Nevada.

Schanzas da far medaglias en nov disciplinas

Da pudair sa concurrer cun l'elita mundiala en l'agen pajais saja segir er ina schanza, ha ditg Urs Lehmann, dapi il 2008 president da Swiss Ski. Las vistas da far intginas medaglias sajan fitg bunas. En nov disciplinas dad 11 hajan las skiunzas ed ils skiunzas svizzers il potenzial da far medaglias. Sulet en il slalom ed en il slalom gigant dals umens saja strusch da quintar cun medaglias, ha accentuà Lehmann.

SRF cun 38 cameras

SRF emetta tut las cursas live da la Corviglia en nossas stivas. Roland Mägerle, el

che segna per la direcziun da las emisiuns directas, ha ditg ch'èn funcziun vegnian en tut 38 cameras. Per emetter las occurrènzas da skis sajan occupadas 150 persunas las proximas duas emnas. Per l'emprima giada fetschia SRF er diever dad ina pendiculara cun camera (Seilbahnkamera) per far maletgs pli attrattivs, ha ditg Mägerle.

Ambiziuns da far medaglias

A las 16.30 èn ils schurnalists e las schurnalistas s'incuntrads ier dumengia en l'hotel Kempinski cun Lara Gut. Ella è la gronda speranza dals fans svizzers tar il Campiadun mundial da skis. Ella haja cler as ambiziuns da far medaglias ed ina gia damaun en il Super-G. Envidà ad ina conferenza da pressa ha ier er la skiunza americana Lindsey Vonn. L'interess per quella sentupada medala è stà fitg grond. Er cun avair damain trenaments sco la concorrenza saja ella da buna speranza da tuttina far eventualmain ina medaglia.



Ils organisaturs speran dad avair da quella aura las proximas duas emnas.

MAD